



金薤琳琅卷十一

太僕少卿吳郡都

穆

唐千福寺多寶佛塔碑

唐顏魯公與郭僕射書

唐西京千福寺多寶佛塔感應碑

南陽岑勛撰朝議郎判尚書武部員

外郎琅邪顏真卿書朝散大夫檢校

尚書都官郎中東海徐浩題額

粵妙法蓮華諸佛之祕藏也多寶佛塔證經之

踴現也發明資乎十力宏建在於四依有禪師
法号楚金姓程廣平人也祖父並信著釋門慶
歸法允母高氏久而無姪夜夢諸佛覺而有娠
是生龍象之徵無取熊羆之兆誕彌厥月炳然
殊相岐嶷絕於葦茹髻鬣不爲童遊道樹萌芽
聳豫章之楨幹禪池映澮涵巨海之波濤年甫
七歲居然厭俗自誓出家禮藏探經法華在手
宿命潛悟如識金環總持不遺若注瓶水九歲
落髮住西京龍興寺從僧籙也進具之年昇座

講法頓收珍藏異窮子之疾走直詣寶山無化
城而可息爾後因靜夜持誦至多寶塔品身心
泊然如入禪定忽見寶塔宛在目前釋迦分身
遍滿空界行勤聖現業淨感深悲生悟中淚下
如雨遂布衣一食不出戶庭期滿六年誓建茲
塔旣而許王瓘及居士趙崇信女普意善來稽
首咸捨珍財禪師以爲輯莊嚴之因資爽塏之
地利見千福默議於心時千福有懷忍禪師忽
於中夜見有一水發源龍興流注千福清澄泛

金華珠璣 卷十一
灑中有方舟又見寶塔自空而下久之乃滅卽
今建塔處也寺內淨人名法相先於其地復見
燈光遠望則明近尋卽滅竊以水流開於法性
舟泛表於慈航塔現兆於有成燈明示於無盡
非至德精感其孰能與於此及禪師建言雜然
歡愜負畚荷插于橐于囊登登憑憑是板是築
灑以香水隱以金鎚我能竭誠工乃用壯禪師
每夜於築階所懇志誦經勵精行道衆聞天樂
咸嗅異香喜歎之音聖凡相半至天寶元載創

構材木肇安相輪禪師理會佛心感通帝夢七
月十三日勅內侍趙思侖求諸寶坊驗以所夢
入寺見塔禮問禪師聖夢有孚法名惟肖其日
賜錢五十萬絹千匹助建修也則知精一之行
雖先天而不違純如之心當後佛之授記昔漢
明永平之日大化初流我皇天寶之年寶塔斯
建同符千古昭有烈光於時道俗景附檀施山
積庀徒度財功百其倍矣至二載勅中使楊順
景宣旨令禪師於花萼樓下迎多寶塔額遂摠

僧事備法儀宸睠俯臨額書下降又賜絹千疋
聖札飛毫動雲龍之氣象天文挂塔駐日月之
光輝至四載塔事將就表請慶齋歸功帝力時
僧道四部會逾萬人有五色雲團輔塔頂衆盡
瞻覩莫不崩悅大哉觀佛之光利用賓于法王
禪師謂同學曰鵬運滄溟非雲羅之可頓心遊
寂滅豈愛網之能加精進法門菩薩以自強不
息本期同行復遂宿心鑿井見泥去水不遠鑽
木未熱得火何階凡我七僧聿懷一志晝夜塔

下誦持法華香煙不斷經聲遞續烟以爲常沒
身不替自三載每春秋二時集同行大德四十
九人行法華三昧尋奉恩旨許爲恒式前後道
場所感舍利凡三千七十粒至六載欲葬舍利
預嚴道場又降一百八粒晝普賢變於筆鋒上
聯得一十九粒莫不圓體自動浮光瑩然禪師
無我觀身了空求法先剌血寫法華經一部菩
薩戒一卷觀普賢行經一卷乃取舍利三千粒
盛以石函兼造自身石影跪而戴之同置塔下

表至敬也使夫舟遷夜壑無變度門劫算墨塵
永垂貞範又奉爲主上及蒼生寫妙法蓮華經
一干部金字三十六部用鎮寶塔又寫一干部
散施受持靈應旣多具如本傳其載勅內侍吳
懷實賜金銅香鑪高一丈五尺奉表陳謝手詔
批云師宏濟之願感達人天莊嚴之心義成因
果則法施財施信所宜先也主上握至道之靈
符受如來之法印非禪師大慧超悟無以感於
宸衷非主上至聖文明無以鑒於誠願倬彼寶

塔爲章梵宮經始之功真僧是葺克成之業聖
主斯崇爾其爲狀也則岳聳蓮披雲垂蓋偃下
欵崛以踴地上亭盈而媚空中晻晻其靜深秀
赫赫以宏敞礪礪承陛琅玕粹檻玉瑱居楹銀
黃拂戶重簷疊於畫棋反宇環其壁璫坤靈聳
屨以負砌天祇儼雅而翊戶或復肩挈摯鳥肘
擐修虵冠盤巨龍帽抱猛獸勃如戰色有奭其
容窮繪事之筆精選朝英之偈贊若乃開扇鏞
窺奧祕二尊分座疑對鷲山千帙發題若觀龍

金華珠璣 卷十一 五
藏金碧晃晃環珮葳蕤至於列三乘分八部聖
徒翕習佛事森羅方寸千名盈尺萬象大身現
小廣座能卑須彌之容歛入芥子寶蓋之狀頓
覆三千昔衡岳思大禪師以法華三昧傳悟天
台智者爾來寂寥罕契真要法不可以久廢生
我禪師克嗣其業繼明二祖相望百年夫其法
華之教也開元關於一念照圓鏡於十方指陰
界爲妙門駟塵勞爲法侶聚沙能成佛道合掌
已入聖流三乘教門總而歸一八萬法藏我爲

最雄譬猶滿月麗天螢光列宿山王映海蟻垤
羣峯嗟乎三界之沈寐久矣佛以法華爲木鐸
惟我禪師超然深悟其見也岳瀆之秀冰雪之
姿果脣貝齒蓮日月面望之厲卽之溫覩相未
言而降伏之心已過半矣同行禪師抱玉飛錫
襲衡台之祕躅傳止觀之精義或名高帝選或
行密衆師共宏開示之宗盡契圓常之理門人
苾芻如巖靈悟淨真空法濟等以定慧爲文
質以戒忍爲剛柔舍朴玉之光輝等旃檀之圍

繞夫發行者因因圓則福廣起因者相相遣則
慧深求無爲於有爲通解脫於文字舉事徵理
含毫強名偈曰

佛有妙法比象蓮華圓頓深入真淨無瑕慧通
法界福利恒沙直至寶所俱乘大車其一於戲上

士發行正勤緬想寶塔思宏勝因圓階已就層
覆初陳乃昭帝夢福應天人其二輪奐斯崇爲章

淨域真僧草創聖主增飾中座耿耿飛簷翼翼
薦臻靈感歸我帝力其三念彼後學心滯迷封昏

衢未曉中道難逢常驚夜杌還懼真龍不有禪

伯誰明大宗

其四

大海吞流崇山納壤教門稱頓

慈力能廣功起聚沙德成合掌開佛知見法爲

無上

其五

情塵雖雜性海無漏定養聖胎染生迷

穀斷常起縛空色同謬蒼荀現前餘香何嗅

其六

彤彤法宇繫我四依事該理暢玉粹金輝慧鏡

無垢慈燈照微空王可託本願同歸

其七

天寶十一載歲次壬辰四月乙丑朔廿二

日戊戌建勅檢校塔使正議大夫行內侍

趙思侖判官內府丞車沖檢校僧義方河
南史華刻

右千福寺多寶塔碑唐岑勛撰顏真卿正
書顏公之書多矣惟此碑盛傳人間歐陽
公作集古錄跋尾而此獨見遺惟趙氏金
石錄有之謂多寶塔者僧楚金所造楚金
嘗寫法華經千餘部寘塔中趙氏復謂於
士大夫家數見之則楚金之書至宋猶有
存者碑今在陝西西安府學

唐顏魯公與郭僕射書

十一月空一日金紫光祿大夫檢校刑部尚書

上柱國魯郡開國公顏真卿謹奉書于右僕射
定襄郡王郭公閣下蓋太上有立德其次有立
功是之謂不朽抑又聞之端揆者百寮之師長
諸侯王者人臣之極地今僕射挺不朽之功業
當人臣之極地豈不有才爲世出功冠一時挫
思明跋扈之師抗廻紇無厭之請故得身畫凌
煙之閣名藏太室之廷吁威足畏也然美則美

金苑珠璣 卷十一
矣然而終始之難故曰滿而不溢所以長守富也高而不危所以長守貴也可不儆懼乎書曰爾惟弗矜天下莫與汝爭功爾惟不伐天下莫與汝爭能以齊桓公之盛業片言勤王則九合諸侯一匡天下葵邱之會微有振矜而叛者九國故曰行百里者半九十言晚節末路之難也從古至今泉我高祖太宗已來未有行此而不理廢此而不亂者也前者菩提寺行香僕射指麾宰相與兩省臺省已下常參官並爲一行

坐魚開府及僕射率諸軍將爲一行坐若一時從權猶未可何況積習更行之乎一昨以郭令公父子之軍破犬羊兇逆之衆衆情欣喜恨不頂而戴之是用有興道之會僕射又不悟前失徑率意而指麾不顧班秩之高下不論文武之左右苟以取悅軍容爲心曾不顧百寮之側目亦何異清晝攫金之士哉甚非謂也君子愛人以禮不聞姑息僕射得不深念之乎真卿竊聞軍容之爲人清修梵行深入佛海況乎收東京

有殄賊之業守陝城有戴天之功朝野之人所
共貴仰豈獨有分於僕射哉加以利衰塗割恬
然於心固不以一毀加怒一敬加喜尙何半席
之座咫尺之地汨其志哉且鄉里上齒宗廟上
爵朝廷上位皆有等威以明長幼故得彝倫叙
而天下和平也且上自宰相御史大夫兩省五
品以上供奉官自爲一行十二衛大將軍次之
三師三公令僕少師保傅尙書左右丞侍郎自
爲一行九卿三監對之從古以然未嘗參錯至

如節度軍將各有本班卿監有卿監之班將軍
有將軍之位縱是開府特進並是勳官用蔭卽
有高卑會讌合依倫叙豈可裂冠毀冕反易彝
倫貴者爲卑所凌尊者爲賤所偪一至於此振
古未聞如魚軍容階雖開府官卽監門將軍朝
廷列位自有次序但以功績旣高恩澤莫二出
入王命衆人不敢爲比不可令居本位須別示
有尊崇只可於宰相師保座南橫安一位如御
史臺衆尊知雜事御史別置一榻使百寮共得

瞻仰不亦可乎聖皇時開府高力士承恩宣傳亦只如此橫座亦不聞別有禮數亦何必令他失位如李輔國倚承恩澤徑居左右僕射及三公之上令天下疑怪乎古人云益者三友損者三友願僕射與軍容爲直諫之友不願僕射爲軍容佞柔之友又一昨蒙僕射誤欲令左右丞勾當尙書當時輒未訓對僕射權貴張目見尤介衆之中不欲顯過今者興道之會還爾遂非再獨八座尙書欲令便向下座州縣軍城之禮

亦恐未然朝廷公讌之宜不應若此今旣若此僕射意只應以爲尙書之與僕射若州佐之與縣令乎若以尙書同於縣令則僕射見尙書令得如上佐事刺史乎益不然矣今旣三廳齊列足明不同刺史且尙書令與僕射同是二品只按上下之階六曹尙書並正三品又非隔品致敬之類尙書之事僕射禮數未敢有失僕射之顧尙書何乃欲同卑吏又據宋書百官志八座同是第三品隋及國家始別作二品高自標致

誠則尊崇向下擠排字缺一意傷甚況再於公堂

獨咄常伯當為令公初到不欲紛披僂俛就命

亦非理屈朝廷紀綱須共存立過爾隳壞亦恐

及身明天子忽震電含怒責戮彝倫之人則僕

射將何字缺一以對

右唐顏魯公與郭僕射英父書世所謂爭

坐位帖此其草藁也世人重公名節故併重

其書重其書故草草之筆亦摹刻之人其

可以不立德邪

金薤琳琅卷十一

金薤琳琅卷十二

太僕少卿吳郡都穆

唐嵩岳少林寺碑

唐少林寺靈運禪師碑

唐少林寺戒壇銘

唐嵩岳少林寺碑

銀青光祿大夫守吏部尚書上柱國

正平縣開國子裴灌文并書

原夫星垂梵界聖緣開萬化之先日照

缺一宮

金苑珠璣 卷三
神跡蘊三靈之始包至虛以見世象教久傳於
曠劫籠羣有以示凡法身初應於中古見神通
之力廣拔苦因開智惠之門深明樂界鶴林變
色觀其戀慕之心鴈塔開扉通其瞻仰之路少
林寺者後魏孝文之所立也東京近甸大室西
偏正氣居六合之中清都控九州之會緱山北
踣亘宛洛之天門潁水南流連荆河之雲澤信
帝畿之靈境陽城之福地沙門跋陁者天竺人
也空心元粹惠性淹遠傳不二法門有甚深道

業緬自西域來遊國都孝文屈黃屋之尊申繡
林之敬太和中詔有司於此寺處之淨供法衣
取給公府法師廼於寺西臺造舍利塔塔後造
翻經堂香水成塗金繩爲約苦心精力俾夜作
晝多寶全身之地不日就功如來金口之說連
雲可庇西緣長澗夾松柏之蕭森北拒深崖覆
筠篁之冥密煙花濃靄暝下天香泉籟清音曉
傳空樂跋陁息心茲地樂靜安居感而遂通境
來斯證寤寐之際若有神人致石磬一長四尺

金華珠璣 卷三
規制自然聲律咸具得之河曲空聞漢使之談
浮于泗濱徒入夏王之貢管絃風夜合清響於
中天鍾梵霜晨諧妙音於上劫時有三藏法師
勒那翻譯經論遊集刹土稠禪師探求正法住
持塔廟虬箭不居光塵易遠虹梁所指象設猶
存周武帝建德中缺一元嵩之說斷釋老之教
率土伽藍咸從廢毀明皇帝繼明正位追崇景
福大象中初復佛象及天尊象廼於兩京各立
一寺因孝思所置以陟岵爲名其洛中陟岵卽

此寺也隨高祖受禪正朔旣改徽號已殊惟此

寺名特

缺一

仍舊開皇中有詔二教初興四方

普洽山林學徒歸依者衆其柏谷屯地一百頃
宜賜少林寺大業之末九服分崩羣盜攻剽無
限真俗此寺爲山賊所劫僧徒拒之賊遂縱火
焚塔院院中衆宇倏焉同滅瞻言靈塔巋然獨
存天龍保持山祇福護神力所及昔未曾有寺
西北五十里有柏谷墅羣峯合沓深谷逶迤複
磴緣雲俯窺龍界高頂拂日俯臨鳥道居晉成

金苑珠璣 卷三
塢在齊爲郡王充僭號署曰轅州乘其地險以
立峯戍擁兵洛邑將圖梵宮皇唐應五運之休
期受千齡之景命掃長虵薦食之患拯生人塗
炭之災太宗文皇帝龍躍太原軍次廣武大開
幕府躬踐戎行僧志操惠瑒曇宗等審靈睭之
所往辯謳歌之有屬率衆以拒僞師抗表以明
大順執充姪仁則以歸本朝太宗嘉其義烈頻
降璽書宣慰旣奉優教兼承寵錫賜地四十頃
水碾一具卽柏谷莊是也迨海宇旣平憲章云

始僞主寺觀盡令廢除僧善護洞曉二門遠該
三行詣闕進表特蒙置立武德中寺有白雀見
貞觀中明禪師造重塔之辰白雀復瑞見璿圖
肇啓初欲呈祥寶殿纔興遽聞相賀高宗天皇
大帝光紹鴻業欽明至理嘗因豫遊每延聖敬
咸亨中乘輿戾止御飛白書題金字波若碑畱
幡象及施物永淳中御札又飛白書一飛字題
寺壁雲開顧鶴電搏遊龍神草競秀於椒塗雲
泉迥飛於錦石雕甍增耀若綴春葩金疊分輝

似懸秋露天皇升遐則天大聖皇后爲先聖造
功德垂拱中有冬竹抽笋塔院後復有藤生證
聖中中使送錢於藤生處修理階陛寺上方普
光堂功德隨日修造自爾飛鳥莫敢翔集此寺
跋陁疏置業造神微皇家尊崇事光幽祕珍符
荐臻於動植靈應亟發於庭除累聖屬心每頒
渥澤王言宸翰旣疊暎於鷄峯寶像珠幡亦交
馳於龍壑皇上睿圖廣運神用多能藉明臺之
化清繹天池之墨妙以此寺有先聖締構之跡

御書碑額七字十一年冬爰降恩旨付一行師
賜少林寺鐫勒梵天宮殿懸日月之光華佛地
園林動煙雲之氣色漢元魏武徒銜奇於篆素
鍾繇蔡雍虛致美於緗簡日者明勅令天下寺
觀田莊一切括責皇上以此寺地及碾先聖光
錫多歷年所襟帶名山延袤靈跡羣仙是宅邁
羅閱之金峯上德居之掩育王之石室特還寺
衆不入官收曾是國土崇絕天人歸仰固以名
冠諸境禮殊恒剎矣高僧跋陁明三藏心禪諸

金華琳瑯 卷三 五
門弟子惠光道房稠禪師等精勤梵行克傳勝業惠光弟子僧達曇隱法上法師等十大德亦號十英復有達摩禪師深入惠門津梁是寄弟子惠可禪師等元悟法寶嘗託茲山周大象中寺初復選沙門中德業灼然者置菩薩僧一百廿人惠遠法師洪遵律師卽其數也皇唐貞觀之後有明遵慈雲元素智勤律師虛求一義洞真諦之源復有大師諱法如爲定門之首傳燈妙理弟子惠超妙思奇拔遠契元蹤文翰煥然

宗塗易曉景龍中勅中岳少林寺置大德十人數內有闕寺中抽補人不外假座無虛授澄什聯華林遠接武星霜殆周於二紀蘭菊每芳於十步上座寺主都維那等牢籠法藏遊息禪林德瑩神珠戒成甘露海內靈岳莫如嵩山山中道缺一字茲爲勝殿二室迴合八谷潺湲地匝貝花門連石柱妙樓香閣俯映喬林金刹寶鈴上搖清漢法界之幽贊如彼皇家之福應如此天長地久不傳忉利之宮劫盡塵微孰記鐵圍之

會精求貞石博訪良工將因墨客之詞或頌金
仙之德聿宣了義遠喻真空其詞曰

恒沙國土微塵品類妄見飛奔正心蘊櫃昏途
莫曉淨根將墜樂於蓋纏若安夢寐丞哉大聖
降跡閻浮潛迴寶軸廣運慈舟實無滅度示有
降柔紺宮西闕白馬東流逃因慢生悟爲信起
玉剎斯建寶山載峙花臺竹林清泉妙水靜惟
真相湛然攸止巖巖嵩嶺河洛巨鎮下屬九溪
上千千仞天磴重阻仙都清峻式創招提是資

誘進婉彼上德載誕耆闍傳業西土演教中華
孝文申敬恩錫仍加經營宴室迥出雲霞中岳
北陞嵩高西麓斜界玉池洞開柏谷紆餘崗澗
連延水木鬱起旃檀云誰卜築吾師苦行清修
道場勵精像宇專力經堂金界繩直椒塗水香
散花有地棲禪得方解空應真默識開士乘盃
遊集振錫戾止翻譯幽偈發揮妙理仙磬感靈
神雀降祉運交土木代歷周隨劫火遞起魔風
競吹法身咸翳淨國同隳或聞興復詎振崩離

神堯應期撥亂反正皇矣覺力大宏福慶式遏醜徒聿扶興聖累降恩旨兼敷錫命高宗時豫先后卜征亟迴雕輦屢倚虹旌巖題玉札地振金聲珍符荐至在物斯呈我皇龍興有典咸秩懿茲上界式儲神筆雲搖大圍鸞迴少室草垂仙露林昇佛日護持八正每候能仁跋陁降德稠公有隣厥後真侶更傳了因辯才高行無替清塵倬焉梵衆代有明哲今我諸公蘊彼禪悅芳越蘅杜淨踰冰雪遠締津梁無非苦節頌上

靈岳山間寶殿秀出梵天孤標神縣芥城可竭桑田有變貞石永刊靈花常遍

開元十六年七月十五日建

右唐嵩岳少林寺碑守吏部尚書裴濯撰并正書少林寺在河南登封縣少室山麓去嵩岳二十里嵩岳一稱太室故有少室而此寺曰嵩岳者統於尊也予正德癸酉嘗遊嵩岳訪少室畱宿寺中見殿後有立雪堂相傳昔達摩之徒惠可欲嗣其法雪

深至腰不去此卽其處寺右上山三里有
達摩洞洞有石達摩面之九年形宛然石
上其事甚異達摩爲釋氏西來初祖可稱
二祖碑雖及其人而二事皆不之載寺復
有太宗與僧教書石刻蓋太宗爲秦王時
寺之僧擒王世充以獻故太宗賜書褒美
而碑云僧執世充姪仁則以歸與教書不
同予故書之以見古人之文不無缺誤如
此然非予之親歷則亦莫能知也

唐少林寺靈運禪師功德塔碑銘

并序

宣德郎試大理評事崔琪撰

聖善寺沙門勤

缺

虛空廣大乎其體智慧圓融乎其用凝而不生

湛爾常寂離修離證非色非心歷微塵劫遍

一缺

字沙界無量國土皆清淨無量昏暗皆光明誰

其得之吾聞諸上人矣上人諱靈運蕭姓蘭陵

人梁武帝後皇考翥彌州恒農縣尉初上人之
生也戒珠孕於母胎定水激於孩性內典宿植

金苑珠玑 卷三 九
外學生知白雲凝其高志明冰峻其苦節泛如
也時不能知常以爲幻境非實泡身是妄五色
令人昏五音令人聾五味令人爽噫輪彼生滅
無時息焉吾將歸根以復于正因遊嵩山至少
林寺有始終之意焉會舅氏掾于高平而上人
遂緇於此郡玉立凡石不可喻其炯然日映衆
星無以方其明者竟移隸茲寺字缺一副乎夙心
無何習禪次於龐塢珪大師潛契密得以真貫
理照十方於自空脫三界於彼著慧眼旣淨色

身亦如始知夫心外無法所得者皆夢幻耳然
後觀大地土木無非佛刹焉空山蒼然窮歲默
坐猿對茶椀鳥棲禪庵彼嶺雲無心卽我心矣
彼澗水無性卽我性矣夫如是孰能以凡聖量
之乎故吾在造化中如夢中也粵開元十有七
祀夏五月廿二日不示以疾泊然而終苦霧晦
黃於天地悲風哀咽於草木吁崩吾禪山澗吾
法海空吾世界使凡百含識大千有情荼於是
火於是可勝言哉故門人堅順獨建靈塔於茲

金苑珠璣 卷十三
山奉遺教也夫碩德丕發不有超世先覺而出
夫等夷者則曷能傳我法印以一燈然千萬燈
乎彼上人者巖然倬立以定慧爲藏以涅槃爲
山圓通於不注之境出沒於無涯之域適來時
也適去順也今則終矣瞻仰如之何夫事往則
迹移歲遷則物換況法與化永念從心積豈可
使上人之高歿而不紀是斲于石以旌斯文銘
曰
上人伊何傳我法印其體也寂其行也順紛彼

識浪汨夫夢情非照不曙非澄不清作大鑿王
爲大禪伯岳立松古蓮青月白一朝化滅六合
悽愴世界颯空雲山忽曠色身謝兮法體存金
界慘兮鐵圍昏噫我所畱者唯心源

天寶九載四月十五日門人堅順建

右唐少林寺靈運禪師碑試大理評事崔
琪撰會善寺沙門行書而缺其名予向遊
少林愛其中碑刻時值大雪命人搨之此
其一也或謂予好奇之過而不知予之所

得抑亦多矣

少林寺戒壇銘 并序

三藏法師義淨製

粵以長安四年歲次甲辰四月七日此寺綱維
 寺主義獎上字缺一智寶都維那大舉法濟禪師
 及徒眾字缺一以少林山寺重結戒壇欲令受戒
 懺儀共遵其處遂乃遠之都下屈諸大德慇懃
 致字缺一延就山門是時我老苾芻義淨及護律
 師嗟禪師思禪師恂禪師暉律師恪律師威律

師等既至寺所解舊結新僉議此邊字缺一為小

界標相永定冀無疑惑于時護鶩珍之字缺一士

無召自來字缺一草結之英賢不期而會數逾一

百行道三旬共繫頸珠俱修字缺一足誠五濁之

希有慕四依之住持虛往實歸紹隆無替庶乎

字缺一田屢改長存立石之基砂界時遷無爽布

金之地恐田成碧海嶺變青川迷此結辰乃為

銘曰

羯磨法在聖教不淪式傳金口是敬是遵目觀

金薤琳琅
西域杖錫東

字缺

一觀盛事而隨喜聊刊紀乎斯

文

開元三年正月十五日立南館學生張傑

書

金薤琳琅卷十二

金薤琳琅卷十三

太僕少卿吳郡都穆

幽州昭仁寺碑

守諫議大夫騎都尉臣朱子奢奉勅撰

大哉乾元寒暑違而成歲赫矣上聖禪代乖而
爲道斯則淳源既往弧矢開戡剪之利天下爲
公揖讓盛皇王之業是知聖無自我不背時以
成務仁惟濟物乃當流而義行豈好異哉蓋因
世而已矣若乃執契提象繼天理物張八極叶

五緯坐元扈遊翠爲受昭華而錫天佩觀滎河而巡溫洛補石於媧皇之世奠山於文命之初殊質文於車服改正朔於寅丑順天地而財成奄寓縣而光宅斯固神宗與汜水一致文祖將晦野同歸者也隨政悖道區夏殲潰星亡日鬪天瘡地反馭朽無秋駕之術履薄罕春冰之懼竭人力於醉飽輕神器於奕棊玉杯非藜藿之用金柱乃驕淫之靡旌蹕遍天下馳道窮華裒暴師韓濊宿兵遼碣貪石田之地忘金鏡之寶

盜駭之乘鶩燕山而不息鼉鼉之梁泛蒼波其無已五岳維塵山川咸震大盜負其肩鏑長鯨衝其漏網不胄不能匡其禍衣冠無以靜其亂伊尹去而夏亡辛甲奔而殷滅人怨神怒衆叛親離觸瑟無漢臣之忠夢驂成秦宮之酷於是九畿幅裂竊名假號四方園視蜂飛蝟結赤眉起劉樊之衆白梃奮陳吳之兵徇趙北而圖王反淮南而稱帝鉤爪鋸牙遞相吞滅茫茫禹迹溝壑無歸蒼蒼彼天何其罔極若乃崇替相襲

天地恒其道靈貺所歸三五更其運是以秦人
弛御豐沛膺赤帝之符夏道云衰景亳得白狼
之瑞殷憂啓聖必將有主撲原靜海上元有屬
我皇帝受之皇帝屯出震之靈稟樞電之精開
日月之明審正氣之貞潛德而隱凝元姑射之
側感而遂通應迹廟堂之上乘龍之夢夙符於
神道斷鼇之心早發於靈鑿蘊風雲於藏用納
宇宙於胸懷濡足授手救焚是急於是御太乙
挹勾陳驅天駟迴地軸乾行岳止雷驚麟震得

兵鈐於元教吞戎韜於黃石龍飛晉水鳳翥河
干命蒼光以泛流麾烏旗以長邁以仁爲本扶
義而西傳檄百城轉鬪千里戰無交兵之虜攻
無湯池之固望鳳墟而一息登灞上而迴首觀
釁而動俟天休命壺漿溢陌厥筐盈塗鬼神叶
贊華夷載佇縲秦嬰於枳道拜殷士於商郊旌
臺之珠畢散於邦國諸侯之玉不畱於服御眷
言乖庶企景來蘇薛舉往因天隙偷安隴坻藉
九州之險成五幡之暴推鋒東嚮結壘西夏同

惡如市轉相煽合帶州連郡豺虺爲羣無竇融
之先覺有隗躄之逃謬遊魂放命豕突幽梁雖
大風之作梗青邱有苗之稱亂丹浦均強比逆
異代同年豈不以道喪鶉居讓王義隱時惟龍
戰爭帝理開者乎是以軒轅五十一伐殷后二
十七征翦暴壽華之澤戮凶絕轡之野非文德
之可綏乃雄略之攸震天子躬御武節親總元
戎灑沈災而括地象正斗極而清天步倚長劍
以肅威佇中區以俯矚運投水轉規之智蓄禮

樂慈愛之兵韜百戰百勝之謀總天關天梁之
術驅駕韓白鞭擊雷電命招搖以啓行詔參伐
以前掃殉義之士聽鼓輦而竊誓蹈恩之衆望
旌笳而張膽呼吸則河海沸盪指麾則崑岱掎
拔聖上順天道好生之德體周王掩骼之仁將
欲克亂在權善師非戰兵交使在宏其自革而
茅旌不建輿櫬莫從告捨旣違行逃遂往吠堯
之犬終成桀用刺由之客俱爲跖徒烏啄獸窮
來犯鋒刃比角爲城池之固召雨恣屈強之力

金苑珠璣 卷十三
非折箠之可答豈亭長之攸制于時攝提在歲
黃鍾紀月義勇同奮賁育爭先下神兵於九天
決獻圖於萬里逆順斯懸轟然大潰僵尸蔽莽
委甲成山擁秦涇而不流投過澗而自滿焚巢
掃窟野無遺寇正傾旻於西北紐缺地於東南
卷氛禳於辰象反光華於日月九伐已施載橐
於武庫五兵罷用偃伯於靈臺分禱旆於應畢
誓山河於將率帝圖咸舉邦政斯澄革汚俗於
維新正王風於舊物鼓之以道德懷之以仁義

春雨以潤之秋陽以暴之解罔深湯帝之慈焚
書下漢王之詔布以新政刑用輕典四海之內
靡然向風八荒之表奔走無斃卻塞蹠林之北
開郡銅柱之南苑蔥山而池鹽澤踰盤木而跨
熱阪鄒生環海自入提封方朔炎洲同歸王會
豈止菌鶴短獨西鷄東鰈之貢而已哉若夫至
人忘已義期拯物黃屋非汾水之榮元珪豈具
茨之貴聖道運而不積神功爲而莫宰雖復大
橫固社長發啓祥猶且置璽陳謙避河爲讓道

外天下情遺尊極而巖廊餘事人神之望難拒
符命儻來歷數之期安避仰追上元之心俯順
域中之請然後履乘石握神珠開黃玉之圖臨
紫辰之位冠百王而稱首與三代而同風巍巍
乎蕩蕩乎粵不可名也於是衢室闢扉賓門啓
路延攬英彥鑒昧幽仄用人不偏於世族得賢
無棄於農瑣故非熊非鸞致光景之佐爲舟爲
楫獲營求之士等五臣之亮采同六相之訏謨
崇臺非一木之枝珍裘乃千金之麗濟濟多士

皇家以寧重以制禮作樂移風也勝殘去殺刑
措也藏金舜嶺菲膳堯宮雉裘非先王之服寶
馬豈鸞旗之用運元覽以照物推赤心以期下
萬方罪已軫推溝之慮百姓爲心順天從之欲
若乃上嗣重光之美元良萬國棣華璿萼之宗
本支百世咸幼陶慈訓言提自昔奉審喻於宸
極得樂善於軒殿非藉保傅之勤寧因師友之
力踰啓誦而高視越郇韓而上征旣而休氣和
年祥風薦祉威鳳爲寶麟趾遊郊若煙非煙浮

曉空而下映似月非月麗宵天而成象禎不絕
書靈無遁迹猗與偉與事高圖史至於登輿下
輦省方巡岳應感必彰形言彌著道盛金奏每
盈玉簡叶獻思於泉涌諧神契於日用陋柏梁
之詞掩南風之曲聖作物覩永貽千載者焉抑
又聞之羲農遐邈軒頊悠緬絕傳信於故老非
取接於聞見百世可知斯言殆息七代更立求
之豈易今之視昔遙然未覩將何以分素青於
三后辨天地於九皇遂能歷選列辟詳觀羣帝

得茂實於千古驗英聲於萬葉斯道何哉將由
孔某登岱紀金繩者七十管仲對齊陳玉檢者
十二亦有漢廓帝圖魏開王業樹豐碑於泗水
譔貞石於繁昌莫不垂鴻名騰顯號播休風於
六儻歌盛德於九韶與天壤而無窮懸貞明而
可久刊勒之美不其懋與然則事止寰中道二缺
字外未辨西方之聖莫知東被之法求真之理
我則未聞雖御辯崆峒非趨涅盤之岸乘雲谷
口寧遊波若之門莫不同陟耶山俱沈業浪生

死無際苦集相因詎照重昏之日誰翦稠林之
樹比夫真如實相解脫妙津道王三千功彌百
億何異吹劍首於雷門巢蚊睫於鵬運者哉是
知伊蘭無實有爲終假漂溺四流遭迴九結踐
畏塗而卒歲趨捷徑其長往大夢無曉可爲歎
息粵若能仁深宏慈獎雖寂泊爲道無來無去
乘機誘發垣墼必追住一子地開方便門翔八
正道示如來藏飄香風於有頂灑甘露於無邊
慧炬明而幽夜朗法橋構而馮河息但爲仁由

已履道自衷表立影從因果非外今我所以仰
勝緣於十號紀武功於七德真俗二諦兼而兩
之皇上昔居因地早宏誓力應迹忍土荷負羣
生屬憂火燎原稽天方割飈林無自靜之木震
海豈澄源之水東戡西翦南征北怨旄鉞所次
酣戰茲邦君輕散千金之賞士重酬九死之命
莫不競凌鋒鏑爭赴水火雖制勝之道允歸上
略而兵凶戰危時或殞喪褰裳不顧結纓荒野
忠爲令德沒有餘雄同艱難於昔晨異歡泰於

茲日有懷亮烈用切旒展仍於戰地爰構神居
變穢土於寶城開蓮花於火宅高烽罷照慈燈
載朗轂旌輟警勝幡斯立拔無明於棘林導焦
熱於渴井盡諸有結永除苦際雖復去順效逆
同歸各徒中涓潁從實惟義重而上忍所被旃
檀與利刃兼忘大慈所覃怨賊將義夫齊指俱
潤法雨同乘大轅迴向菩提無上平等爾乃仰
圖景缺一東井躔其分野下料物土西河限其
封域瑀戈是錫尸臣啓邦之所函館斯開公劉

建都之地梁山南枕甘泉東指面雕雲之鬱蒼
想玉樹之青蔥沃野千里平原超忽先王之桑
梓西州之都會於是詔司空相原隰四衢如砥
八道傍通考極星之曜測土圭之景選杞梓於
南郢徵琬琰於西崑匠石奮斤公輸審墨高門
洞啓層甍有亢藻井瞰烟霞之路步欄拖虹蜺
之色徘徊珠柱陸離璇題春牖前臨秋窻左闢
月殿含影金波上而相照日宮吐曜羲和沈而
猶朗何止四柱成臺高多羅之樹五王立寺臨

金苑珠玑 卷十三
伽尸之水信足上圖駕御俯擬醍醐望鷲山而非遠想雞林而可卽法徒萃止應供來遊咸珠戒無缺威儀莫犯杖錫四禪之林攝囊三朗之路有寶所焉有名僧焉至矣哉伽藍之爲盛也雖復高天已燼大海成田我皇基與淨刹終永永而常傳其詞曰

三界雲擾六趣波揚苦流方割愛火炎崗俱逃津濟莫導舟航長夜無曉非徒未央於昭十號四生是愍道王大千智周上忍慧刀已裂化城

斯引教有殊塗乘無異軫甘露朝灑慈雲夕布品物以亨羣迷式悟捷徑坦道耶山啓路不有善權誰澄惡趣炎行弛德廢道毀常玉弩驚燄金宿騰芒俯震瀛壑仰紊乾綱九野鯨奮八極鷗張亂離瘼矣孰濟生靈黃星表曜赤伏開禎大君應厯粵御神兵乃聖乃武如雷如霆於鑠王旅除凶靖暴關右長驅唐郊大號壤裂逋醜家離浞真刷野屠祆空山剿盜見危殞轡懷忠死綏驚燐宵遠窮魂夜飛我有慈被深仁莫違

建斯淨域永樹歸依歸依伊何俱消五縛淨域
伊何同升妙覺架漢開宇憑霞竦閣朱麗瓊丹
地巖金腹鷲山非遠雞林可求七寶低樹八解
疏流瑞蓮開曉天花不秋戒定攸息應供來遊
凡厥慈衆俱宏上善稠林以闢愛枝爰翦九結
冰泮四禪自緬彼岸可歸法輪恒轉金剛不壞
璿祚惟長慧室長湛皇基載昌僧祇可算恒沙
易量悠哉天厯永配無彊

右昭仁寺碑唐守諫議大夫騎都尉朱子

奢譔歐陽公愛其字畫甚工惜無書人氏
名金石錄嘗載其目亦不言爲何人書也
惟通志金石略以爲虞永興書永興書之
傳世者有孔子廟堂碑然與此不類而金
石略乃謂出於虞公當必有所據昭仁寺
在邠州西八十里昔唐太宗與薛舉戰爭
之處正德癸酉予以使事道邠得搨其本
字畫完好若初刻者真可寶也朱公子鄉
先生唐史有傳其文字人間罕存可見者

金薤琳琅
僅有此耳

金薤琳琅卷十三

金薤琳琅卷十四

太僕少卿吳郡都穆

唐西平郡王李公碑

唐大達法師元祕碑

唐柳公權小字清淨經

唐故太尉兼中書令西平郡王贈太師

李公神道碑銘 并序

特進守司空兼門下侍郎同中書門
下平章事充集賢殿大學士上柱國

晉國公臣裴度奉勅撰

朝散大夫守尚書庫部郎中翰林侍
書學士上柱國賜紫金魚袋臣柳公
權奉勅書并篆額

惟天錫成命於我唐保茲國祚生此人傑則西
平王李公其是乎不然何覆暴如風振槁葉戴
君若鼇冠靈山橫流之中一匡而定公諱晟字
良器其先隴西人也後徙京兆曾祖嵩皇岷州
刺史贈澤州刺史祖思恭皇洮州刺史贈幽州

大都督考欽皇左金吾衛大將軍隴右節度經
略副使贈太子太保代有名跡雄于西土公幼
好學學不爲人及讀呂張孫吳之書慨然有經
邦濟物之志未弱冠遊秦梁閒元侯宿將見者
咸器異之乾元初嘗客武都值酋豪以缺守邁
亂殺掠平人公與所從十數騎馳而射之殪其爲
魁者餘黨遂遯殺所虜獲積如邱山公一無所
取惟椎牛醢酒享士而去邦人感服具以狀聞
特拜左清道率飾以金紫將朝京師自獻方略

屬裔夷紛擾有土急賢河隴將帥相繼表用歷
二府右職所至常以才謀爲其委重累遷至光
祿太常卿階爵在第一品涇原四鎮北庭節度
都知兵馬使四面都遊奕使懸識虜態周知地
形應變不窮有奪有待驥驟庭而莫展雲出岫
而斯飛代宗徵之以左金吾衛將軍爲神策軍
兵馬使屬羌蠻犯蜀朝廷濟師命公督禁旅絕
棧道而往救焉公銜枚過險出賊不意連下堅
壁遂誅首惡還授檢校太子賓客且復舊職建

中二年田悅以魏叛德宗極意致討悉起徂征
以公爲神策先鋒都知兵馬使加御史中丞與
河東河南等道諸軍合擊公濟河而行能以衆
整及破洹水陣解臨洛圍轢魏屬城抵燕通邑
其推鋒劔銳皆先羣帥而寘力焉遙拜左散騎
常侍兼御史大夫厥功未成聞賊泚肆逆皇居
失守西向慟哭載馳載驅行及代北授檢校工
部尚書充神策行營節度公提孤軍募散卒拊
循訓勵以達行在值懷光中叛大駕再遷加檢

校右僕射餘如故尋轉左僕射同平章事兼京兆尹神策軍京畿鄜坊節度觀察等使管內及商華等州副元帥公固守渭城決平秦壘調食制用先發我私捐甘攻苦皆自我始每一言一誓聲淚俱發勇夫義士感而使之蔑不濟矣時自雍而東延于汝洛震于河汴所在征鎮亂略相從公介巨盜之間使聲援斷絕立成師缺一字法缺一字號令肅嚴蒐捕十旬指揮一舉乘墉壑如通道砮臬鏡以清宮而九市三條無輟肆之

驚無秋毫之犯羽書速告鑾輅爰歸廓氛祲爲祥光攄憂憤爲喜氣詩曰允矣君子展也大成斯之謂歟考古視今論功稱忠者多矣若至危而安至難而易卓犖跨邁如公莫儔拜司徒兼中書令俄以凶孽甫寧邊防猶警岐下任重乃以本官兼鳳翔尹鳳翔隴右節度觀察等使及四鎮北庭涇原等州副元帥改封西平郡王加食邑實封至一千五百戶公名懾戎主政和藩部始至而生植少安而訓齊逮四載賦輿十倍其

初會課入輔拜太尉中樞如故人或謂公勲望已高寵渥已極宜從容頤養稍稍遜避公曰不然人臣外則盡力內則盡心若止偷榮孰爲且哲故每承帷幄之間則言咈無隱理奪不回大指以東夏可平西陲可復或已行而事終不顯或未用而身遽不遺以貞元九年八月四日薨于位春秋六十七德宗撫几哭於別次自都邑達關畿無士庶無老幼皆發哀相弔則曩時戢兵安人之德可謂浹於元元之骨髓矣冊贈太

師法賙加等以其年十二月十六日葬于高陵縣奉正原鄭國夫人杜氏祔焉自捐寢至安宅皆所司辦護中貴反覆萬情所奉如不及焉嗚呼以公之靜難扶傾不言所利雖存歿極位始終殊禮而天意若曰其福享未至故迤延于後有子曰愿故檢校司空河中節度等使贈司徒五列雄鎮三爲上公曰聰故光祿寺主簿曰總故太子中允贈兵部郎中曰慈左神武軍大將軍兼御史大夫曰憑故右威衛大將軍兼御史

中丞贈洪州都督曰恕故光祿卿贈右散騎常侍曰憲檢校左散騎常侍嶺南節度觀察等使兼御史大夫進因貴胄達以善政曰愬故檢校左僕射同平章事贈太尉克廣前修仍執醜虜曰懿故渭南縣尉曰聽檢校司徒義成軍節度觀察等使統戎按俗是以似之曰憇右羽林軍將軍曰愨嵐州刺史並地勢吏用兼而有焉粵大和元年秋七月聽拜疏上言以公之徽烈則御製碑文於渭川矣公之風度則詔命圖形於

雲臺矣惟大其邱隴鬱彼松檟望有祁山之象拜無峴首之碑將刊貞石式表幽隧乃命臣度稱伐言時其詞曰

建中季年大盜忽焉皇輿避狄狩于梁川顧謂太師汝才汝略將威致討必殄寇虐太師泣奉捐軀誓衆度其成城可以利用赫矣鋪敦傳于墻垣手搏足躋如衝如援一鼓而破一麾而奔掃清宮闈刷盪妖昏我師莅止我令行矣都人不知已事方喜飛章告慶飭駕言旋鴻烈曜古

金苑珠璣 卷十四 六
謹聲動天車服之錫河山之誓九命而俯一心
若厲俾侯于岐阜安邊陲藩政旣成袞職攸宜
嶽降帝賚矢言詭辭我后嘉猷我躬何爲道直
氣和勞謙終吉福履所綏未享萬一上天不惠
厚宥遄歸垂裕流光用延恩暉翼子肥家將壇
台席繼立奇功代傳休績聽與伯仲永懷高蹤
請于朝廷表是邱封帝曰孝哉胡可不從宣我
祖之不業翳爾父之嘉庸乃詔作銘以觀億齡
大和三年歲次己酉四月庚戌朔六日乙

卯建

右唐西平郡王李晟碑裴晉公撰柳公權
正書晟在唐功蓋天下可謂偉矣唐書列
傳叙其官時與碑不合碑謂晟由左清道
率歷三府右職累遷至光祿太常卿傳則
云授特進試太常卿碑謂晟爲涇原四鎮
北庭節度都知兵馬使代宗徵之以左金
吾衛將軍爲神策軍兵馬使傳則云以右
金吾衛大將軍爲涇原四鎮北庭兵馬使

碑謂晟平蜀還授檢校太子賓客而傳不
書碑謂建中二年以晟爲神策先鋒都知
兵馬使加御史中丞尋拜左散騎常侍兼
御史大夫傳則云晟爲神策先鋒加檢校
左散騎常侍兼魏府左司馬尋授御史大
夫碑謂皇居失守授晟檢校工部尙書充
神策行營節度使傳則云詔拜神策行營
節度使碑謂大駕再遷加檢校右僕射尋
轉左僕射同平章事兼京兆尹神策軍京

畿鄜坊節度觀察等使管內及商華等州
副元帥傳則云進晟尙書左僕射同中書
門下平章事復詔晟兼河中晉絳慈隰節
度使又兼京畿渭北鄜坊丹延節度招討
使又進京畿渭北鄜坊商華兵馬副元帥
碑謂鑿輅爰歸拜司徒兼中書令俄以本
官兼鳳翔尹鳳翔隴右節度觀察等使及
四鎮北庭涇原等州副元帥改封西平郡
王傳則云拜晟司徒兼中書令尋拜鳳翔

隴右涇原節度使兼行營副元帥徙王西
平郡晟之碑作於當時而史成於後代要
當以碑爲是

按原本跋語引碑文商華等州副元帥下
重出復詔晟兼河中晉絳慈隰節度使至
兵馬副元帥云云計
四十三字今節去之

唐故左街僧錄內供奉三教談論引駕
大德安國寺上座賜紫大達法師元祕

塔碑銘

并序

山南西道都團練觀察處置等使朝

散大夫兼御史中丞上柱國賜紫金
魚袋裴休撰

朝議大夫守右散騎常侍充集賢殿
學士兼判院事上柱國賜紫金魚袋

柳公權書并篆額

元祕塔者大法師端甫

缺一字

骨之所歸也於戲

爲丈夫者在家則張仁義禮樂輔天子以扶世
導俗出家則運慈悲定慧佐如來以闡教利生
捨此無以爲丈夫也背此無以爲達道也和尙

其出家之雄乎天水趙氏世爲秦人初母張夫
人夢梵僧謂曰當生貴子卽出囊中舍利使吞
之缺一字誕所夢僧白晝入其室摩其頂曰必當
大宏法教言訖而滅旣成人高顙深目大頤方
口長六尺五寸其音如鍾夫將欲荷如來之菩
提缺一字生靈之耳目固必有殊祥奇表歟始十
歲依崇福寺道悟禪師爲沙彌十七正度爲比丘
邱繇安國寺具威儀於西明寺照律師稟持犯
於崇福寺昇律師傳惟識大義於安國寺素法

師通涅槃大旨於福林寺峯法師復夢梵僧以
舍利滿琉璃器使吞之且曰三藏大教盡貯汝

腹矣

缺一字

經律論無敵於天下囊括川注逢源

會委滔滔然莫能濟其畔岸矣夫將欲伐株杌
於情田雨甘露於法種者固必有勇智宏辯歟

無何

缺一字

文殊於清涼衆聖皆現演大經於太

原傾都畢會德宗皇帝聞其名徵之一見大悅
常出入禁中與儒道議論賜紫方袍歲時錫施
異於化等復詔侍皇太子於東朝順宗皇帝深

仰其風親之若昆弟相與臥起恩禮特隆憲宗
皇帝數幸其寺待之若賓友常承顧問注納偏
厚而和尚符彩超邁詞理響捷迎合上旨皆契
真乘雖造次應對未嘗不以闡揚爲務繇是天
子益知佛爲大聖人其教有大不思議事當是
時朝廷方削平區夏縛吳幹蜀瀦蔡蕩鄆而天
子端拱無事詔和字缺二緇屬迎真骨於靈山開
法場於祕殿爲人請福親奉香燈旣而刑不殘
兵不黷赤子無愁聲蒼海無驚浪蓋參用真宗

以毗

字缺二

政用之明効也夫將欲顯大不思議

之道輔大有爲之君固必有冥符元契歟掌內

殿法儀錄左街僧事以標表淨衆者凡一十年

講涅槃

字缺一

識經論處當仁傳授宗主以開誘

道俗者凡一百六十座運三密於瑜珈契無生

於悉地日持諸部十餘萬遍指淨土爲息肩之

地嚴金

字缺二

報法之恩前後供施數十百方悉

以崇飾殿宇窮極雕繪而方丈匡牀靜慮自得

貴臣盛族皆所依慕豪俠工賈莫不瞻嚮薦金

寶以致誠

缺字

一

端嚴而禮足日有千數不可殫

書而和尚卽衆生以觀佛離四相以修善心下

如地坦無邱陵王公輿臺皆以誠接議者以爲

成就常

缺字

一輕行者惟和尚而已夫將欲駕橫

海之大航拯迷途於彼岸者固必有奇功妙道

歟以開成元年六月一日西向右脅而滅當暑

而尊容若生竟夕而異香猶鬱其年七月六日

遷於長樂之南原遺命茶毗得舍利三百餘粒

方熾而神光月皎旣燼而靈骨珠圓賜諡曰大

達塔曰元祕俗壽六十七僧臘卅八門弟子比

邱比邱尼約千餘輩或講論元言或紀綱大寺

修禪秉律分作人師五十其徒皆爲達者於戲

和尚其出家之雄乎不然何至德殊祥如此其

盛也承襲弟子義均自政正言等克荷先業虔

守遺風大懼徽猷有時堙沒而今閣門使劉公

法緣最深道契彌固亦以爲請願播清塵休嘗

遊其藩備其事隨喜讚歎蓋無愧辭銘曰

賢劫千佛第四能仁哀我生靈出經破塵教網

高張孰辯孰分有大法師如從親聞經律論藏
戒定慧學深淺同源先後相覺異宗偏義孰正
孰駁有大法師爲作霜雹趣真則滯涉俗則流
象狂猿輕鈎檻莫收梏制刀斷尙生瘡疣有大
法師絕念而遊巨唐啓運大雄垂教千載冥符
三乘迭耀寵重恩顧顯闡讚導有大法師逢時
感召空門正闢法宇方開崢嶸棟梁一旦而摧
水月鏡像無心去來徒令後學瞻仰徘徊

會昌元年十二月廿八日建

右唐大達法師元祕碑裴休撰柳公權正
書歐陽公嘗謂物之所遭有幸不幸詩書
遭秦不免煨燼而浮屠老氏以託於字畫
之善遂見珍蓄若此碑是已嗚呼緇流之
藉文字以傳後世如予之所錄蓋不止於
一元祕也

唐柳公權小字清淨經

右唐柳公權小字清淨經予得舊搨本於
四明豐解元坊豐得之鄉人徐蘭蘭好作

金薤琳琅 卷十四
隸字不師漢人而師宋廬陵朱協極蘇學
嘗有協極所書敬齋箴石刻字畫無法俗
惡可厭後之人乃有好之如徐氏者亦其
所遭然也因識此漫及之

金薤琳琅卷十四

金薤琳琅卷十五

太僕少卿吳郡都穆

唐天台山桐柏觀頌

唐唐興寺碑

唐實際寺隆闡大法師碑

唐天台山桐柏觀頌

守太中大夫尚書祠部郎中上柱國

清河崔尙造

字缺四書翰林院學士慶王府屬韓擇

木書

天台也桐柏也代謂之天台真謂之桐柏此兩者同體而異名同契乎元道無不在夫如缺四字

則無是是缺一字柏邪非桐柏邪因斯而談無非

缺一字矣而稽古者言之桐柏山高萬八千丈周

旋八百里其山八重四面如一中有洞天缺一字

卽右弼王王子晉之所處也是之謂不死之缺一

字鄉養真之靈境故立觀有初強名桐柏焉耳

古觀荒廢則已久矣故老相傳云昔葛僊公始

居此地而後有道之士往往因之壇址五六厥

迹猶在洎乎我唐有司馬鍊師居焉景雲中天

子布命于下新作桐柏觀蓋以光昭我元元之

丕烈保綏我國家之永祚者也夫其高居八重

之一俯臨千仞之餘背陰嚮陽審曲面勢東西

數百缺一字南北亦如之連山峩峩四野皆碧茂

樹鬱鬱四時恒青大巖之前橫嶺之上雙峯如

闕中天豁開長澗南寫諸泉合漱一道瀑布百

丈懸流望之雪飛聽之風起石梁翠屏可倚也

琪樹珠條可攀也僊花靈草春秋互發幽鳥清
猿晨暮合響信足賞也始豐南走雲嶂間起剡
川北通煙岑相接東則亞入滄海不遠蓬萊西
則浩然長山無字缺二境總括奧祕鬱爲秀絕苞
元氣以混成鎮厚地而安靜非夫神與仙宅僊
得神營其孰能致斯哉故初構天尊之堂晝日
有雲五色浮靄其字缺一三井字缺一龍之所時有
異雲氣入堂後出者三書之者記祥也然後爲
虛室以鑿戶起層臺而繫土經之殖殖成之翼

翼綴日月以爲光籠雲霞以爲色花散金地香
通元極真侶好道是遊斯息微此鍊師孰能興
之鍊師名承禎一名子微號曰天台白雲河內
溫人晉宣帝弟太常馯之後祖晟仕隋爲親侍
大都督父仁最唐興爲朝散大夫襄州長史名
賢之家奕代清德慶靈之地生此仙才以爲服
冕乘軒者寵患吾身也擊鍾陳鼎者味爽人口
也遂乃捐公侯之業學神仙之事科字缺一教戒
博綜無所遺窈冥夷希微妙詎可識無思無爲

不飲不食仰之彌峻巍乎其若山挹之彌深湛
乎其若海字缺二通才練識瞻學多聞翰字缺一之

工文章之美皆忘其所能也鍊師蘊廣成之德
睿宗繼黃軒之明齋心虛求將倚國政侃侃然
不可得而動也我皇孝思維則以道理國叶帝
堯之用心寵許由之高志故得放曠而處逍遙
而遊聞鍊師之名者足以激厲風俗睹鍊師之
容者足以脫落氛埃以慈爲寶以善救物神以
知來智以藏往允所謂名豈仙格迹在人寰粵

不可測

字缺二

道生乎無名行乎有精分而作三

才播而作萬物故爲天下母修之者昌背之者

亡故爲天下貴況絕學無憂長生久視也哉道

之行也必有階也行道之階非山莫可故有爲

焉有象焉瞻於斯仰於斯若舍是居教將奚依

損之又損之以至於無爲元門旣崇不名厥功

朝請大夫使持節台州諸軍事守台州刺史上

柱國賈公名長源有道化人有德養物嘗謂別

駕蔡欽宗等曰且道以含德德以致美美而不

頌後代何觀乃相與立石紀頌以奮至道之光
其詞曰

邈彼天台嵯峩崔嵬下臨滄海遙望蓬萊漫若
天合呀如地開煙雲路通真仙時來顧我鍊師
于彼瓊臺鍊師鍊師道入元微喻日安坐凌霄
欲飛興廢靈觀鍊師攸贊道無不缺三輪奐窈
窈茫茫通天降祥保我皇唐如山是常

天寶元年太歲壬午三月二日丁未弟子
毗陵道士萬惠超等立

右唐天台山桐柏觀碑尙書祠部郎中崔
尙撰翰林學士韓擇木八分書明皇正書
題額碑稱司馬鍊師居此而曰鍊師名承
禎一名子微唐書隱逸傳謂司馬承禎字
子微則子微非鍊師之名碑誤書耳予昔
遊王屋山至陽臺宮宮乃子微修仙之所
中有碑上刻睿宗與子微書及送還天台
詩一首傳但云睿宗嘗召子微問其術賜
寶琴霞帔還之不云有書與詩此則傳之

疎脫也

唐朝議大夫行聞喜縣令上柱國臨淄

縣開國男于君請移置唐興寺碑

并序

殿中侍御史判職方員外郎高陽許

景先撰

觀道寺主僧師

缺一書

先萬物者始道德爲宗窮言象者以乾坤爲大
豈若道洽沙界盤古無以化其跡功包鐵圍
缺一字首不能紀其要前後際斷衆妙入於真乘色

相皆空定慧生於正覺言之不極其波若之蘊

乎聞喜唐興寺者我國家草昧之所置也時橐

弓矢締構龍宮懸明鏡於方丈運寶圖於羅衛

將祛八難式護四禪乃於西山建斯精舍布金

幽徑樹福

缺一

衡經始險蹊人跡罕到雖三空

屢說給園之衆不俱

缺一

解常流方廣之途尙

阻毗俗常迷於悲幻聚落不聞

缺一

使十地空

有四生無拯爰初構趾數十百年舊令因循不

改其制長者居士旣渴日於寶坊清信比邱徒

金苑珠玉 卷五 六
挈鉞於締議時縣令朝議大夫東海于公名光
庭卽銀青光祿大夫瀛州刺史東海郡公士俊
之孫金紫光祿大夫中書侍郎同中書門下三
品東海憲公之第五子也承五鼎之華胄稟三
辰之粹精陰德未沫亢宗有後在躬而禮義克
舉餘力而文章見稱好學多能以爲入官之具
清慎寡欲彌見在公之心由也四科參爲一貫
理必合於投刃事無遺於下韞故能變蟋蟀之
風展蒲盧之化始鄉退而修里我有昌言終里

退而修家人無遺善此其操乃有裕彈琴自閑
亦旣底於王程將又崇於佛事爲蒲之所不及
理鄴之所未行加以識洞真局智融覺鍵伏忍
於三昧懸解於六通身若明珠淋無瑕也心猶
平地能生衆善且循調御時見宰官精三異之
妙術敷六度之津要由是歷請天府將徒梵宮
雙樹移堅固之林八座改耑閣之岫金山赫赫
與紫殿而飛來紺宇眈眈化青樓而涌出城池
故絳井邑新田士女溢於康莊象馬闐於里閭

一一香蓋懸寶縷之幢種種天花散金燈之地
得未曾有聞所未聞方將洗貪欲之腸腎開盲
聾之耳目納須彌於小芥詎是難思置海水於
虛空未爲希有僉以法雲西蓄佛日有蔀家之
昧今智炬東摧迷途昭牽復之象豈非如來滅
後將有住持時夏縣威神寺法師俗姓張法名
忽字缺一其先衣冠出南陽精持律儀薰修戒行
德超於四果理貫於三伊大道未行同孔某之
歷聘衆生有病等鑿王之授手遂乘杯凍字缺一

振錫兆亭扶聾俗於愛河誘焚如於火宅示方
便品導波若流亡羊於九部之津去馬於三乘
之際莫不爭持寶蓋競解字缺一耨池之棟宇爲

苦海之舟航起予者商繫我明宰時縣丞清河
張佑仁主簿宏農楊浩尉太原王臨尉太原王
銑等並瑚璉名器鸞皇勁翮才無滯用政有異
聲鄉三老進而言曰今敦禮勸農嘉惠也樹法
拯人深慈也我宰君善化前古罕儔豈使浚儀
豐碑空銘景行龍宮後偈獨闕徽言載勒堅金

永傳沙界銘曰

佛言能淨一刹土是謂世間良福田今我莊嚴
招提宇度脫功德海無邊猶如法雲覆羣品亦
如佛日在中天皆是宰官惠明德羣毗安樂離
苦緣樹碑紀功永不朽銖衣拂石億萬年

開元六年歲次戊午九月壬辰朔二日癸
巳建

右唐唐興寺碑殿中侍御史許景先撰寺
在山西聞喜縣縣令于光庭爲移置之景

先之文由是而作光庭之在聞喜不聞其
有善政而乃汲汲爲僧移寺非賢令也

唐實際寺故寺主懷惲奉勅贈隆闡大

法師碑銘

并序

昔吾師因地求真衆魔紛嬈果到成佛龍天捧
圍自作鎮靈山法躬靡易告滅雙樹示跡倫凡
微言不傳慧燭潛照屆夫歲邁千秋時淹五濁
欲海騰沸邪山紛紜於是釋防東逝爰稱兆應
漢夢西通方崇像法或青眸接軫競扇元風或

金苑珠璣 卷五 九
白足相趨爭開佛日至欲繼前賢之令軌爲後
進之康衢照燭重昏慈舟苦派人能宏道斯之
謂歟法師諱懷惲俗張姓南陽人也遠近因宦
播遷京兆廿一代祖安晉丞相襲爵鴻臚公高
祖融守黃門郎遷太子庶子祖英唐解褐太常
太祝襲爵天平公尋轉吳王祭酒握蘭奏位清
陪雅列法師聰敏爲其性相慈善資其風骨母
常山夫人樂姓降胎之月不味羶腥載誕之辰
情欣禁戒暨年登卯歲特異諸童或焚葉爲香

或聚沙爲塔雖飛軒繡轂未嘗畱步月宇香樓
怡然忘返高宗天皇大帝乘乾撫運出震披圖
虛己求賢明敷待士總章元載夢覩法師倏降
綸言遠令虔辟於是臨丹檻邇青蒲廣獻真誠
特蒙褒讚帝乃親授朱紱令處鳳池之榮師乃
固請緇衣願託鸚林之地奉勅於西明剝落善
來忽唱惡業疑銷旣挂三衣俄陪四衆翹勤遽
積思五分而非遙精苦逾深想三祇而未遠時
有親證三昧大德善導闍梨慈樹森踈悲花照

灼情祛

字缺一

漏擁藤井於蓮臺叡化無涯馭鐵

圍於寶國既聞盛烈雅締師資祈解脫規發菩

提願一承妙旨十有餘齡秘偈真乘親蒙付囑

自惟薄祐師資早喪想遺烈而崩心顧餘恩而

雨面爰思宅兆式建墳塋遂於鳳城南神和原

崇靈塔也其地前終峯之南鎮後帝城之北里

歌鍾沸出移上界於陰門泉流激灑比連河於

陽面仍於塔側廣構伽藍莫不堂殿崢嶸遠模

切利樓臺岌業直寫祇園神木靈草凌歲寒而

獨秀葉暗花明逾嚴霜而靡萃豈直風高氣爽

聲聞進道之場故亦臨水面山菩薩全真之地

又於寺院造大窣堵波塔周迴二百步直上一

十三級或瞻星揆務或候日裁規得天帝之芳

蹤有龍王之秘跡重重佛事窮鷲嶺之分身種

種莊嚴盡崑邱之異寶但以至誠多感能事冥

資故能遠降宸衷令賚舍利計千餘粒加以七

珍函笥隨此勝緣百寶幡花令興供養則天大

聖皇后承九元之眷命躡三聖之休期猶尙志

想金園情欣勝躡或頻臨淨刹傾海國之名珍
或屢訪炎涼捨河宮之秘寶法師誠盈而散並
入檀航法師業行高字缺一利益繁多故得名振
九重芳盈四部奉永昌元年勅徵法師爲寺主
於是綱紀僧徒規模釋族緇門濟濟戒德峻而
彌堅紺宇誥誥常住豐而更實猶是才稱物寶
道爲時尊知與不知仰醍醐於句偈識與不識
詢法乳於波瀾法師以慈誘內懷敷揚外積冀
傳聖旨用酬來望每講觀經賢護彌陀等經各

數十遍夫我域者扇激風火嬰抱結漏系諸生
止無常之短期研乎事真攀不亟之虛朕若不
乘佛願力託質淨方則恐淪溺長往清昇永隔
於是言論之際懇勸時衆四儀之中一心專念
阿彌陀佛願乘此勝因相生淨域又以般若神
咒能令速證菩提彌陀佛名亦望橫超惡趣諸
餘妙典雖並積心臺於此勝緣頗偏遊智府嘗
誦大般若咒向盈四万又誦彌陀真偈十萬餘
遍理復使精真厥想念雖微而必就二三于行

功唐捐而靡得豈直諸佛現前神人捧錫而已
矣師爲諸重擔攝爾羣生舉洪灼於耶山掉寶
航於見海悲夫娑婆國中人多弊惡雖復珍臺
寶界因勝侶而歸心至欲逸翥遐征藉良緣而
克進敢憑此義爰發誠心於是廣勸有緣奉爲
九重萬乘四生六趣造淨土堂一所莫不虬棟
凌虛虹梁架迴丹楹滌日青瓊延風無春而反
井舒花不暝而重簷積霧於是神螭戾趾遠鎮
瓊階寶鳳來儀還陪桂戶彫甍畫拱之異窮造

化之規模圓璫方鏡之奇極人天之巧妙又於
堂內造阿彌陀佛及觀音勢至又造織成像并
餘功德並相好奇特顏容湛粹山豪演妙若照
三千海目摘華如觀百億或因繪命采有慈氏
之全身或散扎馳芳得憂填之逸思何獨如來
自在疑降上界之魔故亦菩薩懽怡似救下方
之苦夫以宅生者心心勞則生喪栖神者志志
擾則神亡然菩薩以濟物捐軀上善以遺形徇
節法師情存拯救式奉殷繁汲引雖曰忘懷形

金苑珠玉 卷十五 三
質焉能靡累於是忽嬰風瘵病與時侵靈藥弗
痊胚器俄逝豈夫八林齊白我佛稱於寂滅梁
木其壞吾師等於死生以大足元年十月廿二
日神遷春秋六十有二臨終之際正念無虧顏
色怡悅似有瞻矚北首面西奄然而化悲夫烈
烈歲陰蒼蒼天色乾兮何負殲我惟良業也何
孤喪茲賢哲豈直悲盈四部嗟鹿苑之荒涼抑
亦哀悼兩宮痛蜂臺之間寂猶是俯廻天睠載
紆仙豪遠降恩波爰加制贈奉神龍元年勅實

際寺主懷惲示居三界遠離六塵等心境於虛
空混榮枯於物我棟梁紺宇領袖緇徒包杖錫
之規模躡乘杯之懿躅雖已歸寂滅無待於褒
揚然寵洽友于無忘於縟禮可贈隆闡大法師
主者施行上人以至德聿修良因果著故得天
降成烈用讚芳規追遠慎終生榮死贈足可光
輝淨刹歷塵芥而長存旌賁元門共河山而永
久弟子大溫國寺主思莊等並攀號積慮哀慕
居懷嗟覆護而無時仰音顏而靡日猶恐居諸

易遠淑善溼沉敬想清徽勒茲元琰詞曰
娑婆種覺賢劫能人三祇殄妄五分祈真卽相
離相非身是身猶施慧棧廣濟逃津其十方化
備雙林滅度三界空虛四生哀慕正教旣隱微
言遽歎式啓先哲用資後悟其芳猷廣被至烈
彌殷青眸演聖白足呈真遠導芻芥遐宣墨塵
元門不絕代有其人其猗歟令德遠嗣前英聲
高四部譽重三明慈周有識智契無生法雲葉
落道樹滋榮其豈圖宿殃師資遽亡乾兮何負

殲我惟良徒嗟授几空念傳香非夫勝緣孰荅

恩光

其

邈矣垆野慈顏壙側敬發誠心爰憑淨

域真容湛粹樓臺巋嶷希此善根遠酬明德其

天寶二年歲次癸未十二月景寅朔十一

日景子建

右唐實際寺主懷惲碑無書撰人姓名觀
碑中有弟子思莊敬想清徽勒茲元琰之
語則碑乃惲之徒所撰碑稱惲能誦般若
神咒際遇高宗武后兩朝可謂緇流之出

色者而其老也乃患惡疾以死朝廷復贈
之曰隆闡法師然則其法果安在哉

按南濠跋謂無書撰人姓名攷碑題下有
懷暉及書四字弇州王氏竟以為懷暉撰
及書今據碑文以大足元年十月廿二日
神遷及弟子思莊等敬想清徽勒茲元琰
云云則弇州之說似謬而郭允伯金石史
謂唐又有懷暉禪師姓謝諡大覺元和初
憲宗召居上寺元和十二年二月示滅
建塔灞水此云及書豈後懷暉追及書前
懷暉碑而以為幸耶然此亦臆度之見當
是好事者續書之耳但不知南濠藏本何
以無此四字

金薤琳琅卷十五

南濠藏本

